

四庫全書

經部

欽定四庫全書

經部

詩經疏義會通卷四

詳校官監察御史_臣施朝幹

通政使司副使_臣莫瞻菴覆勘

總校官編修_臣倉聖脉

校對官典簿_臣劉景岳

謄錄監生_臣胡浚

欽定四庫全書

詩經疏義會通卷四

元 朱公遷 撰

王之一之六

王謂周東都洛邑王城畿內方六百里之地

輯錄孔氏曰漢志云周封圻東西長南北短
短長相覆千里按西都方八百里八八六十

四為方百里者六十四東都方六百里六六
三十六為方百里者三十六二都方百里者

百方千在禹貢豫州大華並去外方之間輯
里也

大華即華山在京兆華陰縣南外方即密高
山在潁川郡密高縣今西京登封縣也○增

釋金氏曰外方今河南府伊陽縣伊闕鎮之
西陸渾山據唐志一名方山蓋古為外方春
秋時秦晉遷陸渾之戎居此因名陸渾云北
其山固嵩高之聯峯然謂為嵩高則非爾
得河陽漸音尖侵冀州之南也解錄冀州在

增釋鄱陽張氏曰左傳襄王賜晉文公陽樊
溫原攢茅之田晉於是始啓南陽杜預云在
晉山南河北故曰南陽是未賜晉時為周畿
內故知此得河陽應劭注漢河內郡修武縣
云直南陽城是晉所啓南
陽所謂漸冀州之南也
周室之初文王居

豐武王居鎬至成王時周公始營洛邑為時
會諸侯之所以其土中四方來者道里均故

也自是謂豐鎬為西都而洛邑為東都

輯錄鄭氏

曰洛邑謂之王城是為東都今河西是也周公又營成周今洛陽是也陳氏曰鎬京謂之宗周以其為天下所宗也洛邑謂之東都又謂之成周以周道成於此也洛邑天下之至中豐鎬天下之至險於洛邑定鼎以朝諸侯宅土中以泄四海其示天下也公於鎬京定都以據形勝處上游以制六合其慮天下也遠漢唐並建兩京蓋亦深識天下形勢之所在于而有得於成王周公之遺意歟○增釋鄒陽張氏曰營洛在成王七年周禮以土圭之法測土深正日景以求地中日至之景尺有五寸謂之地中天地之所合也四時之所交也風雨之所會也陰陽之所和也乃建王國焉正作洛之事也深尺鵠反又尸鵠反景與

影同許氏曰東萊先生以為謂之成周乃東都總名河南成周之王城也洛陽成周之下

都也平王東遷之後所謂西周者豐鎬也東周者東都也威烈王之後所謂西周者河南

也東周者洛陽也地理攷異王城本邠邠在河南縣北九里自平王以下十二王皆都此

城至敬王乃遷成周在洛陽縣東北二十里赧王又居王城邠古洛反邠而蜀反

幽王嬖音閉褒姒生伯服廢申后及太子宜臼

宜臼奔申申侯怒與犬戎攻宗周弑幽王于

戲許宜反輯錄地名亦水名在驪山之北今新豐有戲亭晉文侯鄭武

公迎宜臼于申而立之是為平王徙居東都

王城輯錄孔氏曰鎬京為西周王城為東周及敬王去王城而遷成周自是又謂王城為西周成周為東周○增釋金氏曰幽王立褒人有罪請入女子於王以贖罪是為褒如幽王三年王之後宮見而愛之生子伯服五年廢中后及太子宜臼以褒姒為后伯服為太子宜臼奔申十二年申侯與緡西夷犬戎攻幽王殺幽王驪山下虜褒姒晉文侯鄭武公衛武公秦襄公皆以兵來救晉鄭即於中立宜臼是為平王緡慈陵反國在沂州於是王室遂卑與諸侯無異故其詩不為雅而為風然其王號未替也故不曰周而曰王子張

曰王次衛者恐混於二南故以三衛問之程子曰諸侯并滅而王迹熄故雅亡而為國風

矣增釋許氏曰政令不能行於天下故雅亦無所為而作西都數百年而無風也古之錄詩所以示勸戒有雅以道天下之故則無事於采風雅既亡則取民間之詩以紀政俗王風十篇黍離為大夫行役餘皆民間詩也蓋雅必出於朝廷風則在下之歌詠古則必有其制或工可兼下下不可僭上也是以東征之事大於獫狁之役而東山勞歸之詩不在采薇出車之列雖出於變亦不與六月采芣同什也於此可見風雅之體不可易置矣

其地則令河南府及懷孟等州是也輯錄河南府即

今河南府懷州今懷慶府
孟州今孟縣並隸河南

彼黍離離彼稷之苗行道靡靡中心搖搖知我者謂我

心憂不知我者謂我何求悠悠蒼天

叶鐵因反下同

此何人哉

賦而興也黍穀名苗似蘆高丈餘穗黑色實圓重離

離垂貌稷亦穀也一名稭

音祭

似黍而小或曰粟也

增釋

許氏曰黍似梁而非梁稷今之稭也二物稍相類但黍黃而稷黑黍小而稷大今中原皆有之二物似差

互今以傳文兩易之曰黍穀名似稷而小穗黃色稷亦穀名一名稭苗似蘆高丈餘穗黑色實圓重或曰

粟也四字如此恐得其實蓋古之梁即今之粟古之粟即今之穀粟穀實之總名說文稷五穀之長謂獨

長於衆穀也

邁行也靡靡猶遲遲也搖搖無所定也悠悠

遠意蒼天者據遠而視之蒼蒼然也○周既東遷大

夫行役至于宗周過故宗廟宮室盡為禾黍閔周室之顛覆徬徨不忍去故賦其所見黍之離離與稷之

苗以興行之靡靡心之搖搖

黍之實垂有靡靡之意稷之苗動有搖搖之意

本因感歎黍稷而賦之但其下兩句義又相因故為賦而興

既嘆時人莫識已意

輯錄鄭氏曰怪我久留而不去

又傷所以致此者果何人哉追怨之

深也

輯錄解頤曰彼宗廟之墟既有黍矣彼宮室之墟復有稷矣兩言彼者見地非一處而莫下盡

為禾黍也是以使我行之靡靡則足欲前而不忍也心之搖搖則心若懸而靡定也謂我心憂者知我者也而亦非能有以解我憂也謂我何求者不知我者也則亦奚責於彼哉悠悠蒼天嘆其遠而莫可詰也

彼何人哉嘆其罪之不容誅也雖
不斥其人而所以追恨之意深矣

○彼黍離離彼稷之穗音遂行邁靡靡中心如醉知我者

謂我心憂不知我者謂我何求悠悠蒼天此何人哉

賦而興也穗秀也稷穗下垂如心之醉故以起興醉則

無力故以穗
下垂為興

○彼黍離離彼稷之實行邁靡靡中心如噎於結反叶
於悉反

知我者謂我心憂不知我者謂我何求悠悠蒼天此何

人哉

賦而興也噎憂深不能喘反息如噎之然稷之實

如心之噎故以起興虛則通實則塞而噎

黍離三章章十句

元城劉氏曰常人之情於憂樂之事初遇之則其心變焉次遇之則其變少衰三遇之則其心如常矣至於君子忠厚之情則不然其行役往來固非一見也初見稷之苗矣又見稷之穗矣又見稷之實矣此三章第而所感之

心終始如一不少變而愈深此則詩人之意也
輯錄謝氏曰天王見弑於驪山天地之大
變中國之大恥東周臣子之大讎也文武
成康之宗廟而盡為禾黍聞者當流涕矣心
搖搖而不忍去天悠悠而不我知能為閔周
之詩者一行役大夫之外無人也不知平王
而聞此詩也亦有惻于中否乎吾觀書至文
侯之命知平王之不足以有為矣所以訓戒
晉文侯者惟曰自保其國而已王室之盛衰
故都之興廢悉置度外吾於黍離之詩重有
感也夫通釋曰小弁詩曰蹢躅周道鞠為茂
草我心憂傷惄然如擣正若此詩之意然則
黍離之感既有不徒於大夫行役之時而已
兆於褒姒母子潛亂之日
大夫追怨之辭有所歸矣

君子于役不知其期曷至哉

叶將反

雞棲

音西

于埗

音時

日之

夕矣牛羊下來

叶陵反

君子于役如之何弗思

叶新反

賦也君子婦人目其夫之辭鑿牆而棲

音西

曰埗日夕

則羊先歸而牛次之

輯錄輔氏曰羊性畏露晚出而早歸常先於牛也

○大

夫久役于外其室家思而賦之曰君子行役不知其

還反之期且今亦何所至哉

輯錄輔氏曰曷至哉則不知其今在何所也

雞則棲于埗矣日則夕矣牛羊則下來矣是則畜

許六

反產出入尚有旦暮之節而行役之君子乃無休息

之時使我如何而不思也哉

○君子于役不日不月曷其有佸

戶括反叶
戶劣反

雞棲于桀

日之夕矣牛羊下括

古活反叶
古劣反

君子于役苟無飢渴

巨叶

反列

賦也佸會桀桀

音戈
歷也

括至苟且也○君子行役之久

不可計以日月而又不知其何時可以來會也亦庶

幾

平聲

其免於飢渴而已矣

言庶幾音望之之辭輯錄
孔疏庶幸也幾覲也庶幾

者幸覲
之意

此憂之深而思之切也

輯錄輔氏曰可以日
月計則思有節也知

其會期則思猶有止也不日不月則不可計以日月也曷其有估則不知其何時可以來會也苟無飢渴則不敢必其歸而但幸其不至於飢渴而已其憂思之情益甚矣

君子于役二章章八句

前章極思之之心後章致願之之心輯錄謝氏

曰雨雪霏霏遣戍役而預言歸期也四牡之使寧幾何
蔓勞還率而詳言歸期也
時勞之曰我心傷悲吉甫在錫不過千里勞
之曰我行永久吾觀先王之心惟恐一人之
勞苦惟恐一人之怨咨何也不如是非所以
體群臣也木於推已及物之怨發而為序情
閑勞之仁豈有無期度者哉今君子于役至
于不知其期仁恕之意民然矣文武宣王之
治何時而可復見乎

君子陽陽左執簧

音黃

右招我由房其樂

音洛

只

音止

且

子徐反

賦也陽陽得志之貌簧笙竽管中金葉也蓋笙竽皆

以竹管植於匏中而竅

苦弔反穴也

其管底之側以薄金

葉障之吹則鼓之而出聲所謂簧也故笙竽皆謂之

簧笙十三簧或十九簧竽三十六簧也由從也房東

房也

孔疏云房在室旁人出入處也按古人之居中為室室之東為東房西為西房自東房入北階

通後堂則東房即所由之路也

只且語助辭○此詩疑亦前篇婦人

所作蓋其夫既歸不以行役為勞而安於貧賤以自

樂其家人猶識其意而深嘆美之皆可謂賢矣豈非

先王之澤哉或曰序說亦通宜更詳之

如序說則房為小寢國君

有房中之樂而此之君子猶簡兮之碩人也輯錄謝氏曰東周之季君子知世之不可救道之不可行高蹈遠引自得其樂者多矣未聞以相招祿仕為樂者也今也進不能捐軀以報國退不能潔身以全道呼俦引類仕為伶官陽陽然志得而意滿曰其樂只且自謂不勝其樂矣君子當如是耶古之仁人憂不在一身常以天下之憂為憂樂不在一身必以天下之樂為樂衣人之衣則分人之惠乘人之車則載人之難位其朝食其祿視其國治亂安危漠然不加欣戚於吾心甚於南人之視北越人之疾秦仁人不忍為也君子者國人所仰望而法則也出處語默喜怒哀樂皆可以為民極吾不知其樂只且果何樂也東還

之後世與道交喪號為君子者如此嗚呼周轍何時而西乎竊意此詩當從序說較謂前篇婦人所作者為優

○君子陶陶左執翾

徒刀反

右執我由敖

五刀反

其樂只且

賦也陶陶和樂之貌翾舞者所持羽旄之屬敖舞位也

君子陽陽二章章四句

由東房入後堂然後就舞位言之序也如序說

則房為作樂之處教為舞之位其言亦有序矣

揚之水不流束薪彼其

音記

之子不與我戍申懷

叶威反

哉

懷哉曷月予還旋音歸哉

興也揚悠揚也水緩流之貌彼其輯錄其語助辭之子戍人

指其室家而言也戍屯兵以守也申姜姓之國平王

之母家也在今鄧州信陽軍之境輯錄鄧州即今鄧州屬南陽府信陽

軍今改信陽縣屬汝寧府並隸河南懷思曷何也○平王以申國近楚

數被侵伐故遣畿內之民戍之而戍者怨思作此詩

也興取之不二字如小星之例輯錄通釋曰先儒多以為水弱不流薪楚

喻平王微弱不能徵發諸侯蓋由誤認此詩之體此詩乃興之不取義者特取之不二字相應耳故集傳

特指其例
以明之

○揚之水不流束楚彼其之子不與我戍甫懷哉懷哉
曷月予還歸哉

興也楚木也甫即呂也亦姜姓書呂刑禮記作甫刑
而孔氏以為呂侯後為甫侯是也當時蓋以申故而
并戍之今未知其國之所在計亦不遠於申許也輯錄
孔氏曰言甫與許者以其俱為姜姓既重章以變文
因借甫許以言申其實不戍許甫也六國時秦趙國
為嬴姓史記漢書多
謂秦為趙亦此類也

○揚之水不流東蒲

叶滂古反

彼其之子不與我戍許懷哉

懷哉曷月予還歸哉

興也蒲蒲柳春秋傳云董澤之蒲杜氏云蒲楊柳可

以為箭者是也

輯錄孔氏曰陸璣云蒲柳有兩種皮正青者曰小楊其一種皮紅者曰大

楊其葉皆長廣於柳葉皆可為箭幹故宣公十二年傳曰董澤之蒲可勝既乎嚴氏曰毛以為草鄭以為蒲柳皆通蒲草見陳澤

波蒲柳見陳東門之楊許國名亦姜姓今潁昌府許

昌縣是也輯錄潁昌府許昌縣即今河南開封府許州也

揚之水三章章六句

戍守專為申戍甫與許則以申之故以事勢輕重為

先後之
序也

申侯與夫戎攻宗周而弑幽王則申侯者王

法必誅不赦之賊而平王與其臣庶不共戴

天之讎也

輯錄曲禮云父之讎不與共戴天陳氏曰父者予之天不能復父讎

仰無以視乎皇天矣報之意誓不與讎俱生此所以弗共戴天也今平王知

有母而不知有父知其立已為有德而不知

其弑父為可怨至使復讎討賊之師反為報

施去聲酬恩之舉則其忘親逆理而得罪於天

已甚矣

輯錄通釋曰吾意平王所以但知母家之重而不知弑父之讎者皆自疇

昔怨父一念之差所致也究其忘親逆理之罪吾於其傳與有責焉又況先王

之制諸侯有故則方伯連帥以諸侯之師討

之王室有故則方伯連帥以諸侯之師救之

天子鄉遂之民供貢賦衛王室而已今平王

不能行其威令於天下無以保其母家乃勞

天子之民遠為諸侯戍守故周人之戍申者

又以非其職而怨思焉則其哀懦微弱而得

罪於民又可見矣

輯錄李迂仲曰以公存心則如采薇以私存心則如

揚之水造戍則同而美刺則異也

嗚呼詩亡而後春秋作其

不以此也哉

輯錄輔氏曰亡親逆理以賊人之秉彝非法枉道以使人之勞

役此民之所以怨思也欲其悉力致死以報其上難矣哉所謂民至愚而神於此可見先

王之所以畏而敬之也此正平王之詩故曰詩亡然後春秋作其不以此也哉張南軒曰

胡文定公云按邶鄘而下多春秋時詩而謂詩亡然後春秋作何也自黍離降為國風天

下無復有雅而王者之詩亡春秋作於隱公適當雅亡之後夫黍離所以為國風者平王

自為之也平王忘國於是王者之迹熄而詩亡天下貿貿焉日趨於異端禽獸之歸故孔

子懼而
作春秋

中谷有蓷

吐雷反

瞶

呼但反

其乾矣有女仳

匹指反

離嘒

口愛反

其嘆

士丹反

矣嘒

其嘆

矣遇

人之艱

難矣

興也蓷

即蓷字

離

並反

也葉

似蓷

蓷白蘇也

諸本作蓷誤

方

莖白華華生節間即今益母草也

輯錄

本草曰

芑蔚一名益母節節生

莖如雞冠其子三稜嚴氏曰據本草芑蔚正生海濱池澤其性宜濕

瞶

燥

仳

別也嘒

聲艱難窮厄也○凶年饑饉室家相棄婦人覽物起

興而自述其悲歎之詞也

有字其字矣字相呼為興

○中谷有推暵其脩叶式反矣有女仳離條其𪗇叶息反矣

條其𪗇矣遇人之不淑矣

興也脩長也

輯錄陳氏曰長茂者亦為所暵

或曰乾也如脯之謂脩

也條條然𪗇貌𪗇感子六反口出聲也悲恨之深不止

於嘆矣淑善也古者謂死喪饑饉

輯錄兩雅穀不熟曰饑菜不熟曰饉

皆曰不淑盖以吉慶為善事凶禍為不善事雖今人

語猶然也○曾氏曰凶年而遽相棄背盖哀薄之甚

者而詩人乃曰遇斯人之艱難遇斯人之不淑而無

怨懟

音隆

過甚之詞焉厚之至也

○中谷有蓂蓂其濕矣有女仳離

張劣反

其泣矣

泣矣何嗟及矣

興也嘆濕者旱甚則草之生於濕者亦不免也

孔氏

曰先言乾次言脩後言濕見凶年之淺深也

啜泣貌何嗟及矣言事已至

此末如之何窮之甚也

輯錄輔氏曰方其嘆且恨之時而曰遇人之艱難遇人之

不淑而無怨懟過甚之詞固見其厚矣及其至於傷而泣也則亦曰何嗟及矣而已殆有知其不可奈何

而安於命之意此尤見其厚也豈非先王之澤哉

中谷有蓷三章章六句

范氏曰世治則室家相保者上之所養也世
亂則室家相棄者上之所殘也其使之也勤
其取之也厚則夫婦日以衰薄而凶年不免
於離散矣伊尹曰匹夫匹婦不獲自盡民主
罔與成厥功輯錄見商書
咸有一德故讀詩者於一物
失所而知王政之惡一女見棄而知人民之
困周之政荒民散而將無以為國於此亦可

見矣

輯錄謝氏曰夫婦人之大倫也。飢饉而相棄，人道之大變也。婦無一語怨其夫。

而有哀矜惻怛之意焉。知其無可奈何而安之，若命此義婦也。與忠臣孝子同道人，不幸而處三綱之變，以此存心，則綽綽然有餘裕矣。

有兔爰爰，雉離于羅。我生之初，尚無為

禾反

我生之後

逢此百罹

叶良何反

尚寐無吺

比也。兔性陰狡，爰爰緩意，雉性耿介，離麗

平聲歷也

羅網

尚猶罹

離音

憂也。尚底幾

平聲

吺也

五戈反

動也。○周室衰

微，諸侯背

音

叛，君子不樂

音洛

其生而作此詩，言張羅

本以取兔今兔狡得脫而雉以耿介反離于羅以比

小人致亂而以巧計幸免君子無辜而以忠直受禍

也

輯錄呂東萊曰此因所見為比也兔之大以比諸侯雉之小以自比者言諸侯之背叛者恣睢自如

而周人反受其禍也為此詩者蓋猶及見西周之盛故曰方我

生之初天下尚無事及我生之後而逢時之多難如

此然既無如之何則但庶幾寐而不動以死耳或曰

興也以兔爰興無為以雉離興百罹也

兔脫禍則安
前雉入羅則

有憂其義相
因亦可為興下章放此

○有兔爰爰雉離于罍

音罍叶步廟反

我生之初尚無造我生

之後逢此百憂

叶一笑反

尚寐無覺

居孝反叶居笑反

比也享覆車

人奢反即今翻車網也

也可以掩兔造亦為也覺

寤也

○有兔爰爰雉離于罍

音衙

我生之初尚無庸我生之後

逢此百凶尚寐無聰

比也置罍

音輟

也即享也或曰

毛傳

施羅於車上也庸用

聰聞也無所聞則亦死耳

兔爰三章章七句

哀傷之意
反覆道之

緜緜葛藟

力軌反

在河之滸

呼五反

終遠

于萬反

兄弟謂他人

父

夫矩反

謂他人父亦莫我顧

叶果五反

興也緜緜長而不絕之貌岸上曰滸○世衰民散有

去其鄉里家族而流離失所者作此詩以自歎言緜

緜葛藟則在河之滸矣今乃終遠兄弟而謂他人為

已父

物得所托人失所依人不如物故以起興○增釋許氏曰葛藟本生於山谷丘陵在河之滸非

其所以興已之失所也亦通

已雖謂彼為父而彼亦不我顧則其

窮也甚矣

繇繇葛藟在河之涘

音侯叶矣
始二音

終遠兄弟謂他人母

叶蒲

彼反謂他人母亦莫我有

叶羽
已反

興也水涯曰涘謂他人父者其妻則母也有識有也

識有即顧
念之意

春秋傳曰不有寡君

輯錄嚴氏曰莫我
有言視之若無也

○繇繇葛藟在河之澹

順春反

終遠兄弟謂他人昆

叶古
均反

謂他人昆亦莫我聞

叶微
勻反

興也夷上洒下曰澹

洒七罪反
澹也高峻也
上平坦而下水深為澹

澹之為

言脣也

輯錄爾雅注洒先典反深也許氏曰洒猶洗也岸上面平夷而其下為水洗蕩蠶入若脣

也
昆兄也聞相聞也

葛藟三章章六句

先言父次言母次言昆此三章相承之序也

彼采葛

叶居謁反

兮一日不見如三月兮

賦也采葛所以為絺綌蓋淫奔者託以行也故因以指其人而言思念之深未久而似久也

○彼采蕭

叶疎鳩反

兮一日不見如三秋兮

賦也蕭荻也

荻音狄蒿屬他本作荻非

白葉莖竈科生有香氣祭

則燔以報氣

燔即藝字報氣即升臭也

故采之曰三秋則不止三

月矣

○彼采艾兮一日不見如三歲

本與艾叶兮

賦也艾蒿屬

輯錄爾雅曰一名冰瑩注今艾蒿也

乾之可灸

九人音救

故采

之

輯錄呂東萊曰蒿為締絡蕭共祭祀艾療疾特訓釋三物見采之由不於此取義也

曰三歲

則不止三秋矣

采葛三章章三句

思念之意以漸而深輯錄輔氏曰采葛采蕭采艾其說託

言明矣至於思念之情流而不止如此則為淫奔之辭者宜哉

大車檻檻毳

尺銳反

衣如蒺

吐收反

豈不爾思畏子不敢

賦也大車大夫車檻檻車行聲也毳衣天子大夫之

服

王氏曰子男毳冕五章天子之卿六命服與子男等此之大夫則卿也輯錄春官典命王之卿六命

其大夫四命此以未出封者言及出封則各加一等服亦以此為節也

蒺蘆之始生也

毳衣之屬衣繪而裳繡

宗彛藻粉米畫於衣黼黻繡於裳

五色皆備

其青者如蒺

考工記五色備謂之繡蓋繡雜五色其青者如蒺其赤者如璫此與下章各舉

其一爾淫奔者相命之詞也子大夫也不敢不敢奔

也○周衰大夫猶有能以刑政治其私邑者故淫奔

者畏而歌之如此然其去二南之化則遠矣此可以

觀世變也

此詩之言所謂小人革面民免而無恥者蓋政刑之效視德化不相及也故去二南

為遠輯錄輔氏曰漢廣之遊女端莊靜一人見而知其不可求野有死麕之女子貞潔自守人見而知其不可犯此所以為二南之化也豈至於有淫奔之心必待有所畏而後不敢哉今觀此詩則世變之愈下可知矣

○大車噶噶

他敦反

毳衣如璫

音門

豈不爾思畏子不奔

賦也噶噶重遲之貌

輯錄孔氏曰噶噶行之貌故為重遲上言行有聲此言之貌

互相見也

璫玉赤色五色備則有赤

○穀則異室死則同穴叶戶謂予不信有如皦反古了日

賦也穀生穴壙音曠皦白也○民之欲相奔者畏其大

夫自以終身不得如其志也故曰生不得相奔以同

室庶幾死得合葬以同穴而已謂予不信有如皦日

約誓之辭也增釋吳師道曰前二章言不敢不奔猶不失為變也此章猶言生不得相從死

猶不善云耳故下申以約誓之辭亦邪思之不解者也

大車三章章四句首章畏子不敢其辭微二章畏子不奔其辭顯至三章所

云則顯顯然其辭確欲之所蔽以漸而深○哀痛如黍離可謂忠矣以刑政治民如大車

亦庶乎其有能者矣變雖云變而東都之大夫則寥寥乎僅見者也

丘中有麻彼留子嗟彼留子嗟將

七羊反

其來施施

叶特遮反

賦也麻穀名子可食皮可績為布者

輯錄本草曰一名麻勃此麻上

花勃勃者麻子味甘平無毒園圃所蒔今人作布及履用之

子嗟男子之字也將

願也施施喜悅之意○婦人望其所與私者而不來

故疑丘中有麻之處復

扶又反

有與之私而留之者今

安得其施施然而來乎

○丘中有麥彼留子國彼留子國將其來食

賦也子國亦男子字也來食就我而食也

○丘中有李彼留之子

叶獎里反

彼留之子貽我佩玖

叶舉里反

賦也之子并指前二人也貽我佩玖冀其有以贈已也

丘中有麻三章章四句

始則望其來即已繼則望其食於已終則望其

有以贈於已願望之意以漸而深

王國十篇二十八章百六十二句

以忘親逆理衰懦柔

弱之平王為東都之始王則王室可知矣是使民無聊賴如兔爰流離失所如葛藟室家

相棄如中谷有推而采葛有麻淫奔亂俗又
如此周轍而欲西也難哉故親耒黍痛惜而
已

鄭一之七

鄭邑名本在西都畿內咸林之地宣王以封

其弟友為采

音菜

地後為幽王司徒而死於犬

戎之難是為桓公其子武公掘

一作滑並音鵲

突定

平王於東都亦為司徒又得號檜之地乃徙

其封而施舊號於新邑是為新鄭咸林在今

華州鄭縣

輯錄即今陝西西安府華州

新鄭即今之鄭州

是也

輯錄即今河南開封府鄭州

其封域山川詳見檜風

程子曰鄭畿內之諸侯也王變則鄭亦變矣故以鄭次王嚴氏曰周之政令不行則畿內之鄭亦自為列國矣愚謂諸侯吞并則周衰周衰則侯國異政自近者始三衛王鄭相次其以此歟

緇衣之宜兮敝予又改為兮適子之館

叶占玩反

兮還予授

子之粲兮

賦也緇黑色

輯錄考工記曰三八為纁五入為緇七入為緇

緇衣卿大夫居

私朝音潮之服也

輯錄孔氏曰緇衣即士冠禮所云玄冠朝服緇帶素鞶是也卿士朝於王

服皮弁不服緇衣退食私朝宜稱去聲改更平聲適之館

舍

諸侯入王朝必有寓舍猶後世之稱邸也輯錄考工記匠人營國外有九室九卿朝焉注在路門之

外九卿贊三公以佐天子而治外政故其入朝而居之

粢餐也

輯錄飲饌曰餐又爾雅注今河

北人呼食或曰粢粟之精鑿

音作者朱子曰漢有白粢為餐音孫

足也輯錄許氏曰粟一石得米六斗為糲糲米一石舂為八斗為鑿

○舊說鄭桓公武

公相繼為周司徒善於其職周人愛之故作是詩

按序

以此美武公辨說從之蓋桓公武公雖皆善其職而世繼其善者尤可美况桓公之死已在幽王被弑時

此詩作於東都則為武公之作明矣集傳既引舊言
說而舉此兩句似乎無美二公非專美武公也

子之服緇衣也甚宜德稱其服敝則我將為子更為之備禦

以慰安之庶幾久於位也且將適子之館既還而又授子以粲遺問

以親厚之庶母懷其土也言好之無已也輯錄輔氏曰一句美武公之德稱其服也二句

欲其服之常新也四句欲其粟之常繼也既欲其服之常新又欲其粟之常繼發乎情形於歌詠如此則

其好善之誠心於是為至也程子曰好賢無已之意當就敝子還子四字上看

○緇衣之好兮敝予又改造叶在早反兮適子之館兮還予

授子之粲兮

賦也好猶宜也

○緇衣之蓆

叶詳
齋反

兮敝予又改作兮適子之館兮還予

授子之粢兮

賦也蓆大也程子曰蓆有安舒之義服稱其德則安舒也

緇衣三章章四句

殷勤篤厚之
意反覆道之

記曰好賢如緇衣又曰於緇衣見好賢之至

輯錄解頤曰緇衣所以為好賢之至者以其
始終之如一也始之厚者不能保其終之不

薄始之勤者不能保其終之不急惟緇衣之
好賢不然其改造改作既始終之無間而設
館授聚復前後之如一衣欲其常新粟欲其
常繼儀刑欲其常接乎目議論欲其常接乎
耳殷勤繼緒久而不厭
所以為好賢之至也

將

七羊反

仲子兮無踰我里無折之舌

反

我樹杞豈敢愛之

畏我父母

叶滿彼反

仲可懷

叶胡威反

也父母之言亦可畏

叶於非反

也

賦也將請也仲子男子之字也我女子自我也里二
十五家所居也杞柳屬也生水傍樹如柳葉麓而白

色理微赤盖里之地域溝樹也○莆田鄭氏曰此淫

奔者之辭

輔氏曰此雖為淫奔之詩然其心猶有所畏未至於蕩然而無忌也故列於鄭詩之

首以見其為風之始變也歟愚謂此與王風大車畧相似

○將仲子兮無踰我牆無折我樹桑豈敢愛之畏我諸

兄

叶虛陽反

仲可懷也諸兄之言亦可畏也

賦也牆垣也古者樹墻下以桑

○將仲子兮無踰我園無折我樹檀

叶徒訟反

豈敢愛之畏

人之多言仲可懷也人之多言亦可畏也

賦也園者圃之藩其內可種木也檀皮青滑澤材彊

韌

輯錄音刃
堅柔難斷

可為車

將仲子三章章八句

自父母而諸兄自諸兄而衆人言之次也○增釋許

氏曰此詩詞氣類野有死麕之卒章然有畏父母諸兄國人之言猶為善於彼也此可見理義根於人心有終不可泯者身之陷於淫邪不能禁其欲也有畏人之意良心之存也倘上之教化行而下之風俗厚若此婦人豈不能脩飭而以貞信自守邪然則小民心術之微皆上之人有以興喪之耳

叔于田

叶地

反

巷無居人豈無居人不如叔也洵美且仁

賦也叔莊公弟共叔段也事見春秋

增釋許氏曰左氏傳隱公元年

初鄭武公娶于申曰武姜生莊公及共叔段莊公寤生驚姜氏惡之愛段欲立之請於武公公弗許及莊公即位為之請京使居之謂之京城大叔既而大叔命西鄙北鄙貳於己又收貳以為己邑至於原延大叔完聚繕甲兵具卒乘將襲鄭田取禽也巷里塗也公伐京京叛大叔段段出奔共

洵信美好也仁愛人也○段不義而得衆國人愛之故作此詩言叔出而田則所居之巷若無居人矣非實無居人也雖有而不如叔之美且仁是以若無人耳或疑此亦民間男女相悅之詞也

○叔于狩九叶始反巷無飲酒豈無飲酒不如叔也洵美且

好

叶許厚反

賦也冬獵曰狩

輯錄杜氏曰狩圍守也冬物畢成獲則取之無所擇也輔氏曰洵美且好

猶言好而又好也

○叔適野

叶上與反

巷無服馬

叶蒲補反

豈無服馬不如叔也洵

美且武

賦也適之也郊外曰野服乘也

增釋許氏曰二章三章傳有音釋而無其

說蓋與首章之意同也無飲酒服馬謂無如叔之善飲酒服馬者此詩雖段不義得衆而人愛之然詳味

其辭非小人黨惡者之言蓋君子知幾者所作也終篇雖全稱美畧無譏刺之辭而所美者惟田狩飲酒之事舍是蓋無足言者且公子居大都專事驅騁田獵沈湎于酒而人心歸仰如此則將何所不至邪禍敗之來豫知之矣

叔于田三章章五句

愛念之意反覆道之

叔于田乘乘

下繩證反

馬

叶蒲補反

執轡

如組

音祖

兩驂

如舞

叔在

藪

素口反叶素苦反

火烈

具舉

禮

音袒

楊

素歷反

暴虎

獻于

公所

將

七羊反

叔無

狃

女九反叶

戒其

傷女

音汝

賦也叔亦段也車衡也

車輓也

外兩馬曰驂

如舞

謂諧和

中節

輯錄御法有舞交衢也

皆言御之善也數澤也火焚而射

也烈熾盛貌具俱也

輯錄釋文韓詩云禽獸居之曰藪毛氏曰田者大艾草以為防

或舍其中然後焚而射焉孔疏云未田之前誓士戒衆止其間教戰既畢乃出而驅禽納之於防然後焚

此所焚之防草而射之此恐未必然檀楊肉袒也輯

一說火火田也焚除萊草而田獵也凡獨言袒者袒去裳而露楊言袒楊者則并袒去楊而露肉也暴空手搏虎也公莊

公也狃習也國人戒之曰請叔無習此事恐其或傷

汝也蓋叔多材好勇而鄭人愛之如此善御多才也暴虎好勇也

戒以無狃鄭人愛之也

○叔于田乘乘黃兩服上襄兩驂鴈行反戶郎叔在藪火

烈具揚叔善射忌

音記

又良御

叶魚反

忌抑磬

苦定反

控

口貢反

忌抑縱送忌

賦也乘黃四馬皆黃也衡下夾轅兩馬曰服襄駕也

馬之上者為上駕猶言上駟也

史記孫武傳有上馬中駟下駟之說蓋上

中下三等也

鴈行者驂少次服後如鴈行也揚起也忌抑

皆語助辭騁馬曰磬止馬曰控舍

音捨

拔

音拔

曰縱覆彌

曰送

拔

矢括也

彌弓

弣頭也

縱則放

矢送則送

矢磬

見其善御縱送見其善射此皆美之之詞

輒

輒

輒

輒

輒

輒

輒

輒

錄覆倒也既發矢則弓隨
勢傾倒直指於前以送矢

○叔于田乘乘鵠

音保叶補苟反

兩服齊首兩驂如手叔在藪

火烈具阜

符有反

叔馬慢

叶黃反

忌叔發罕

叶虛反

忌抑釋棚

永

忌抑鬯

勅亮反

弓

叶姑宏反

忌

賦也驪白雜毛曰鵠今所謂烏驄也齊首如手兩服

並首在前而兩驂在旁稍次其後如人之兩手也阜

盛慢遲也發發矢也罕希釋解也棚矢筥

音同

蓋春秋

傳作永

昭公二十五年公欲去季氏叔孫陷公圍公徒釋甲執水而踞輯錄注永櫝丸蓋或云櫝

九是箭筒其蓋可以取飲

皂弓囊也與韋同言其田事將畢而從

容整暇如此

輯錄鄭氏曰田事且畢則馬行遲發矢希蓋矢而弣弓

○亦喜其

無傷之詞也

馬慢發罕則獸幾盡釋棚皂弓則事亦已昔懼其或傷今喜其無傷首末兩章

相應也

大叔于田三章章十句

一章獵事舉二章獵事盛三章獵事畢輯錄解

頤曰段之為人以射則善以御則良以容止則甚習以材力則甚武如是而甚不仁夫惟不仁所以欲紛凡而奪其位也而國人愛之若此者豈盡出於公哉主教不明人心不古顛倒是非混淆黑白固有不勝其可嘆者矣

陸氏曰首章作大叔于田者誤蘇氏曰二詩
皆曰叔于田故加大以別之不知者乃以段
有大叔之號而讀曰泰又加大于首章失之

矣

輯錄解頤曰段之輕浮淺露如此固不得
為善矣然莊公所以處之者果得為盡善

乎仁人之於弟也亦親愛之而已矣教誨之
而已矣若是則莊公所以處段者無以異於
舜之處象孰得而議之哉今莊公不然始則
恣其所為而不問終則操之已臧而不恕則
是其予之者乃所以奪之也其寵之者乃所
以殘之也其不仁已甚矣聖人錄二詩於國
風既以著叔段之惡而書鄭伯克段于春秋
復以甚莊公之罪其亦可以為後世戒矣按

此說本隱公元年左氏傳

清人在彭

叶普郎反

駟介旁旁

補彭反叶補岡反

二矛重

直龍反

英

叶於

良反河上乎翺翔

賦也清邑名清人清邑之人也彭河上地名駟介四

馬而被甲也旁旁馳驅不息之貌二矛酋

慈秋反

矛夷

矛也英以朱羽為矛飾也酋矛長二丈夷矛長二丈

四尺並建於車上則其英重累而見

輯錄矛鉤兵也考工記注酋夷

發聲夷為長酋為短酋之言道也道迫也言短也建者邪逸立之也累上聲疊也一本作疊見音現翺

翔遊戲之貌○鄭文公惡高克使將清邑之兵禦狄

于河上

輯錄孔氏曰文公捷厲公子閔公二年冬十月狄入衛衛在河北鄭在河南恐其渡河

侵鄭故使高克將清邑之兵於河上禦之久而不召師散而歸鄭人為之

賦此詩言其師出之久無事而不得歸但相與遊戲如此其勢必至於潰散而後已爾

○清人在消駟介麇麇

表驕反

二矛重喬河上乎逍遙

賦也消亦河上地名麇麇武貌矛之上句

音

曰喬所

以懸英也英弊而盡所存者喬而已

○清人在軸

叶音胄

駟介陶陶

叶徒反

左旋右抽

叶勅反

中軍

作好

叶許候反

賦也軸亦河上地名陶陶樂

音洛

而自適之貌左謂御

在將

去聲下同

車之左執轡而御馬者也旋還車也右謂

勇力之士在將車之右執兵以擊刺者也抽拔刃也

中軍謂將在鼓下居車之中即高克也

將車則將在中左執御右

執兵器士卒之車則左執弓右執矛中人御○增釋許氏曰凡兵車執弓矢者在左生五兵者在右御者

在中唯將車則鼓懸車中而將立鼓下御者在左車右在右

好謂容好也○東萊

呂氏曰言師久而不歸無所聊賴姑遊戲以自樂必潰之勢也不言已潰而言將潰其詞深其情危矣

清人三章章四句

前二章言其遊戲而不歸後一章陳其遊戲之狀也

事見春秋

增釋許氏曰閔公二年鄭棄其師左氏傳鄭人惡高克使帥師于河

上久而弗召師潰而歸高克奔陳孔疏是時狄侵衛衛在河北鄭在河南恐其渡河鄭故

禦之○胡氏曰人君擅一國之名寵生殺予上聲

奪惟我所制耳使高克不臣之罪已著按而誅之可也情狀未明黜而退之可也愛惜其

才以禮馭之亦可也烏也何可假去聲以兵權委

諸竟音境上坐視其離散而莫之卹乎春秋書

曰鄭棄其師其責之深矣

羔裘如濡叶而朱而由二反洵直且侯叶洪姑洪鉤二反彼其音記之子

舍音救命不渝叶客朱容周二反

賦也羔裘大夫服也如濡潤澤也洵信直順侯美也其語助辭舍處渝變也○言此羔裘潤澤毛順而美彼服此者當生死之際又能以身居其所受之理而

不可奪

舍命不渝猶曰守義而不變爾輯錄輔氏曰舍命不渝所包者闡命有二有指理而言者

有指氣而言者此蓋兼之以理而言則居其理而不變以氣而言則居其分而不踰理可以無氣故集傳

止以理言之

蓋美其大夫之詞然不知其所指矣

○羔裘豹飾孔武有力彼其之子邦之司直

賦也飾緣

去聲

袖也禮君用純物臣下之故羔裘而以

豹皮為飾也孔甚也豹甚武而有力故服其所飾之

裘者如之司主也

○羔裘晏兮三英粲兮彼其之子邦之彥

叶魚反兮

賦也晏鮮盛也三英裘飾也未詳其制榮光明也彥者士之美稱

羔裘三章章四句

一章美其存心二章美其從政三章美其為人輯錄解頤

曰舍命不渝則必不微倖而苟得而於守身之道得矣邦之司直則必不諛悅以求容而於事君之道盡矣既能順命以持身又能忠直以事上此所以為邦之彥也歟按此云明哲保身者即所謂順理以守身非趨利避害而偷生免死以全軀之謂也

遵大路兮摻

所覽反

執子之祛

叶起反

兮無我惡

烏路反

兮不

憲

音故也

賦也遵循摻擥

魯敢反通作攬

祛袂

輯錄孔疏袂是袖之大者祛是袖頭小稱俱是

衣袖

寔速故舊也○淫婦為人所棄故於其去也摻其

祛而留之曰予無惡我而不留故舊不可以遽絕也

宋玉賦有遵大路兮攬予祛之句亦男女相說

音之

詞也

輯錄通釋曰宋玉登徒子好色賦曰遵大路兮攬予祛贈以芳花詞甚妙注云攬衣袖欲與同

歸折芳誦詩以贈遊女也集傳援此為證者蓋宋玉去此詩之時未遠其所引用當得詩人之本旨彼為

男語女之詞猶此詩為女語男之詞也

○遵大路兮摻執子之手兮無我醜

市由反叶齒九反

兮不寔

好叶許也

賦也醜與醜同欲其不以已為醜而棄之也好情好

也

輯錄輔氏曰無我惡兮不寔故也猶假義以責之至於無我醜兮不寔好也則真情見而詞益哀矣

遵大路二章章四句

故舊已不可遽棄而況情好之人乎留之之意以漸

而深

女曰雞鳴士曰昧旦子興視夜明星有爛將翱將翔弋

鳧

音符

與鴈

賦也昧晦旦明也昧旦天欲旦昧晦未辨之際也明

星啓明之星先日而出者也弋繳音灼射謂以生死繫

矢而射也

輯錄歐陽氏曰泛而言射則在去聲以射其物而言則在入聲後放此毛韻注繳生

絲縷弋箭箸之以鳬水鳥如鴨青色背上有文○此胃禽足謂之矰繳

詩人述賢夫婦相警戒之詞言女曰雞鳴以警其夫

而士曰昧旦則不止於雞鳴矣婦人又語其夫曰若

是則子可以起而視夜之如何意者明星已出而爛

然則當翱翔而往弋取鳬鴈而歸矣其相與警戒之

言如此則不留於宴

安昵尼質切也

之私可知矣

○弋言加

叶居之居何二反

之與子宜

叶魚奇魚何二反

之宜言飲酒

與子偕老

叶呂孔反

琴瑟在御莫不靜好

叶許厚反

賦也加中

去聲

也史記所謂以弱弓微繳加諸鳧鴈之

上

見楚世家

是也宜和其所宜也內則所謂鴈宜麥之屬

是也

牛宜稌羊宜黍豕宜稷犬宜粱鴈宜麥魚宜苽注云言其氣味相成也

○射者男

子之事而中饋婦人之職故婦謂其夫既得鳧鴈以

歸則我當為子和其滋味之所宜以之飲酒相樂

音洛

下期於偕老而琴瑟之在御者亦莫不安靜而和好

其和樂而不淫可見矣御親近也琴瑟靜好則物各得所而家道之齊可見矣夫

婦之和其效如此

○知子之來叶六反之雜佩以贈叶音則之知子之順之雜

佩以問之知子之好呼報反之雜佩以報之

賦也來之致其來者如所謂脩文德以來之見論語雜

佩者左右佩玉也上橫曰珩下繫三組貫以纁步服反輯

錄蚌之珠中組之半貫一大珠曰瑤末懸一玉兩端別名也

皆銳曰衝牙兩旁組半各懸一玉長博而方曰琚其

末各懸一玉如半璧而內向曰璜又以兩組貫珠上

繫珩兩端下交貫於瑀而下繫兩璜行則衝牙觸璜

而有聲也呂氏曰非獨玉也

觿音攜又觿觿與針同管

凡可佩者皆是也

觿以解結燧以取火觿以刺病管不知何用或曰即玉琯也輯錄內

則篇注云觿管在管中也

贈送順愛問遺也○婦又語去聲其夫

曰我苟知子之所致而來及所親愛者則將一作當解

此雜佩以送遺報答之蓋不惟治其門內之職又欲

其君子親賢友善結其驩同歡心而無所愛於服飾之

玩也

輯錄輔氏曰觀此詩則鄭國之俗雖曰淫亂然在下之人夫婦之間猶知禮義勤生業不昵於

宴私相安於和樂而又能贊助其君子親賢樂善以輔成其德此可以觀先王之澤與民性之善矣

女曰雞鳴三章章六句

始則相勉以男子之事繼則願相以閨門之職

終則助其先施以篤親友之好○此詩與齊雞鳴同意然彼言會朝之事可知其為國君之妃此其男子躬親射弋則士庶人之妻也輯錄解順曰雞鳴而興昧旦而往言其時之有常也翺翔而往鳬鴈而歸言其事之有常也弋而取之於外宜而和之於內蓋欲各供其職也酒食以養其身琴瑟以和其志蓋欲同享其樂也來者致其來贈者送其往順以愛之好以親之皆來之之意問以遺之報以答之皆贈之之意又見其重不在物而在乎

德也前二章相戒以職分之常為後一章相勉以德業之交修

有女同車顏如舜華

叶芳無反

將翔將翔佩玉瓊琚彼美孟

姜洵美且都

賦也舜木槿也樹如李其華朝生暮落

幘錄陸佃云取瞬之義今

人言一瞬

孟字姜姓洵信都閑雅也○此疑亦淫奔之詩

言所與同車之女其美如此而又歎之曰彼美色之

孟姜信美矣而又都也

幘錄輔氏曰鄭詩惟此篇為男悅女之詞

○有女同行

叶戶郎反

顏如舜英

叶於良反

將翔將翔佩玉將將

七羊
反 彼美孟姜德音不忘

賦也英猶華也將將聲也德音不忘言其賢也

好色之人

心志盡惑所美非美故亦以德音稱之德音不忘者言其美德不可忘也輯錄王氏曰於瓊琚言德之容於將將言德之音各以其類也

有女同車二章章六句

一章悅其色二章悅其德

山有扶蘇隰有荷華

叶芳無反

不見子都乃見狂且

子餘反

興也扶蘇扶胥

踈須二音

小木也荷華芙渠也

輯錄釋文曰未開曰

茁莕已發曰芙渠

子都男子之美者也狂狂人也且語辭也

○淫女戲其所私者曰山則有扶蘇矣隰則有荷花

矣今乃不見子都而見此狂人何哉

彼所宜有者皆有此所宜見者

不見不宜見者乃見之蓋以尋常之物而興怪異之事也

○山有橋松隰有游龍不見子充乃見狡童

興也上竦無枝曰橋亦作喬游枝葉放縱也龍紅草

也一名馬蓼葉大而色白生水澤中高丈餘子充猶

子都也

充盛也男子之顏色衣服皆美而盛也

狡童狡獪

古外反

之小兒

也

山有扶蘇二章章四句

狡甚於狂故以為序輯錄輔氏曰山有扶蘇已

得而其欲未饜之辭
獲兮未得而亟欲得之
辭狡童則已絕而又欲
別圖之辭褰裳則未
絕而防其欲絕之辭
○增釋許氏曰此詩恐
是淫女見絕於男子而
復私於人乃思絕者
之美好而厭所私者之
狂狡也或曰有女同
車男戲女山有扶蘇女
戲男其男子之言曰
有女與我同車同行者
貌如舜華舜英我將
之以翱翔佩玉固若美
矣然豈如彼美孟姜
容貌則洵美且都語言
則使人不忘哉同車
者則所與淫之女孟姜
則虛設之辭也女則
以山有扶蘇
答之如傳意

薜

他落反

兮薜兮風其吹女

音汝

叔兮伯兮倡

昌亮反

予和

胡卧

反叶户女
圭反

興也。擗，木槁而將落者也。女，指擗而言也。叔伯，男子之字也。予，女子自予也。女叔伯也。○此淫女之詞言

擗兮擗兮，則風將吹女矣。叔兮伯兮，則盍倡予而予

將和女矣。

此專以語相應為興。○增釋金履祥曰：擗，木葉之將落者。風吹則落矣。以見人生之

易老故欲且與之相樂也。

○擗兮擗兮，風其漂

匹遙反

女。叔兮伯兮，倡予要

於遙反

女。

興也。漂，飄同。要，成也。

成者所以終其曲也。

穉兮二章章四句

先和之後要
之言之序也

彼狡童兮不與我言兮維予之故使我不能餐

叶七丹反
叶七宣

反兮

賦也此亦淫女見絕而戲其人之詞言悅已者衆子
雖見絕未至於使我不能餐也

○彼狡童兮不與我食兮維予之故使我不能息兮

賦也息安也

輯錄補氏曰男子之
淫佚非狂則狡也

狡童二章章四句

戲謔之意
反覆道之

子惠思我褰裳涉漆側巾反子不我思豈無他人狂童之

狂也且子餘反

賦也惠愛也漆鄭水名狂童猶狂且狡童也且語辭也○淫女語其所私者曰子惠然而思我則將褰裳而涉漆以從子子不我思則豈無他人之可從而必於子哉狂童之狂也且亦謔之之辭

○子惠思我褰裳涉洧叶于反子不我思豈無他士鉏里反

狂童之狂也且

賦也洧亦鄭水名

輯錄漢地志潁川郡陽城縣潁水所出東南至長平入潁水

經洧水過新鄭縣南潁水從西北來與之合

士未娶者之稱

褰裳二章章五句

戲謔之意反覆道之輯錄輔氏曰婦人從一而終者也狡

童褰裳二詩則其縱欲而賊理也甚矣

子之丰

芳容反叶芳用反

兮俟我乎巷

叶胡貢反

兮悔予不送兮

賦也丰豐滿也巷門外也○婦人所期之男子已俟

乎巷而婦人以有異志不從既則悔之而作是詩也

○子之昌兮俟我乎堂兮悔予不將兮

賦也昌盛壯貌將亦送也

○衣

反於既

錦褰

苦迥反

衣裳錦褰裳叔兮伯兮駕予與行

賦也褰褌

即單也

也

輯錄鄭氏曰蓋以褌穀為之中裳用錦而上加褌穀焉惡其文之著

也叔伯或人之字也○婦人既悔其始之不送而失

此人也則曰我之服飾既盛備矣豈無駕車以迎我而偕行者乎

○裳錦褰裳衣錦褰衣叔兮伯兮駕予與歸

賦也婦人謂嫁曰歸

丰四章二章章三句二章章四句

既悔不從其
人繼又變志

於他人蓋不止於二三其
德矣縱欲之意以漸而深

東門之墠

音善叶
工演反

茹

音
如蘆反

在阪

音反叶
孚懶反

其室則邇

其人甚遠

賦也東門城東門也墠除地町町

他頂反

者

孔氏曰除地去草故

云町町輯錄除地
去草也町町平貌

茹蘆茅蒐

音
披也

一名茜

音
倩可以染

絳陂

音
坡者

曰阪

爾雅注陂
陀不平也

門之旁有墠墠之外有阪

阪之上有草識

音
志

其所與淫者之居也室邇人遠者

思之而未得見之詞也

○東門之栗有踐家室豈不爾思子不我即

賦也踐行列貌門之旁有栗栗之下有成行列之家

室亦識其處也即就也

輯錄輔氏曰思之切而冀其並來就已之辭

東門之墠二章章四句

一章慕之二章怨之

風雨淒淒

子西反

雞鳴喈喈

音皆叶居奚反

既見君子云胡不夷

賦也淒淒寒涼之氣喈喈雞鳴之聲風雨晦冥蓋淫

奔之時君子指所期之男子也夷平也○淫奔之女

言當此之時見其所期之人而心悅也

○風雨瀟瀟雞鳴膠膠叶音驕既見君子云胡不瘳叶憐蕭反

賦也瀟瀟風雨之聲膠膠猶喈喈也瘳病愈也言積思之病至此而愈也

○風雨如晦叶呼洧反雞鳴不已既見君子云胡不喜

賦也晦昏已止也輯錄許氏曰喈喈膠膠不已皆雞聲紛雜之意○慶源輔氏曰喜甚

於瘳瘳甚於夷云胡不喜言如之何而不喜也蓋喜劇之辭

風雨三章章四句喜幸之意反覆道之

青青子衿

金音

悠悠我心縱我不往子寧不嗣音

賦也青青純

音

準緣去聲

之色具父母衣純以青

見記

子

男子也衿領也悠悠思之長也我女子自我也嗣音

繼續其聲問也此亦淫奔之詩

○青青子佩

叶蒲眉反

悠悠我思

叶新齊反

縱我不往子寧不來

叶陵之反

賦也青青組綬

輯錄

玉藻注曰所以貫佩玉相承受者組綬一物也

之色佩佩

玉也

輯錄孔氏曰禮不佩青玉以青色組綬帶之

○挑他刀反兮達他末反叶今在城關兮一日不見如三

月兮

賦也挑輕儇烜平聲跳躍之貌達放恣也輯錄輔氏曰此淫女望其

所與私者既無音問又不見其來而極其怨之辭也

子衿三章章四句一章二章則致思而微青之三章則切責而深思之

揚之水不流束楚終鮮息淺反兄弟維予與女女汝同無信

人之言人實廷居南女反

興也兄弟婚姻之稱輯錄爾雅曰婦之黨為婚兄弟之黨為姻兄弟注云古人皆

謂婚姻禮所謂不得嗣為兄弟是也

記魯子問壻之伯父致命女氏

曰某之子有父母之喪不得嗣為兄弟疏云夫婦有兄弟之義

子女男女自相謂也

人他人也廷與誑同○淫者相謂言揚之水則不流

束楚矣終鮮兄弟則維予與女矣

緩弱之水不能流去其所載寡特之

人不能舍去其所依二者皆有綢繆相與之意故以為興

豈可以他人離間去聲之

言而疑之哉彼人之言特誑女耳

○揚之水不流束薪終鮮兄弟維予二人無信人之言

人實不信

叶斯人反

興也

揚之水二章章六句

誑女則所欺者一人耳不信則欺人也多矣其誕妄

亦已久矣

出其東門有女如雲雖則如雲匪我思存古老反綯衣綦

巨基反巾聊樂音洛我負于云反

賦也如雲美且衆也綯白色綦蒼艾色

青而微白也如艾也綯

衣綦巾女服之貧陋者此人自目其室家也

輯錄嚴氏曰猶

云荆釵布裙也負與云同語辭也○人見淫奔之女而作此

詩以為此女雖美且衆而非我思之所存我之所思不在此也

不如已之室家雖貧且陋而聊可以自樂音洛也是時

淫風大行而其間乃有如此之人亦可謂能自好去聲

而不為去聲習俗所移矣羞惡烏故反之心人皆有之豈

不信哉

○出其閨音閨音都有女如荼音徒雖則如荼匪我思且餘

反縞衣茹蘆聊可與娛

賦也閨曲城也城門之外有副城回曲以障門者闕城臺也城上之臺當門

也堂茶茅華輕白可愛者也且語助詞茹蘆可以染絳

故以名衣服之色娛樂也

輯錄輔氏曰聊樂我負自樂其樂也聊可與娛夫婦

同樂其樂也

出其東門二章章六句

自足之意反覆道之輯錄輔氏曰鄭詩唯女曰

雞鳴與此詩為得夫婦之道夫子錄之正以見人性之本善而先王之澤猶未泯也

野有蔓草零露漙漙

徒端反叶上宛反

兮有美一人清揚婉兮邂逅

逅相遇適我願

叶五反兮

賦而興也蔓延也漙露多貌清揚眉目之間婉然美

也詳見齊風邂逅不期而會也○男女相遇於野田

倚嗟注

草露之間故賦其所在以起興言野有蔓草則零露

漙矣有美一人則清揚婉矣

本即所在而賦之又用其語相呼也邂逅

相遇則得以適我願矣

○野有蔓草零露漙漙有美一人婉如清揚邂逅相遇與子偕臧

賦而興也漙漙亦露多貌臧美也與子偕臧言各得其所欲也

野有蔓草二章章六句

喜幸之意
反覆道之

溱與洧方渙渙

叶于反

兮士與女方秉簡

古願反

兮女

曰觀乎士曰既且

子餘反

且往觀乎洧之外洵訏

况于反

且

樂

音洛

維士與女伊其相謔贈之以勺藥

賦而興也

本即所在而賦之又用其語相呼也

渙渙春水盛貌盖冰解

而水散之時也簡蘭也其莖葉似澤蘭廣而長節節

中赤高四五尺

輯錄朱子曰蘭與澤蘭相似生水旁紫莖赤節綠葉光潤尖長有岐陰小

紫且語辭洵信訏大也勺藥亦香草也三月開花芳

色可愛

輯錄本草注曰勺藥有二種有草勺藥木勺藥

○鄭國之俗三月上

巳之辰采蘭水上以祓除不祥

輯錄韓詩注采作秉

故其女問

於士曰盍往觀乎士曰吾既往矣女復

扶反

要平聲之

曰且往觀乎蓋洧水之外其地信寬大而可樂也於

是士女相與戲謔且以勺藥相贈而結恩情之厚也

此詩淫奔者自叙之詞

○溱與洧

音留

其清矣士與女殷其盈矣女曰觀乎士

曰既且且往觀乎洧之外洵訏且樂維士與女伊其將

謔贈之以勺藥

賦而興也劉深貌殷衆也將當作相聲之誤也

漆洧二章章十二句

縱欲之意
反覆道之

鄭國二十一篇五十三章二百八十三句

鄭衛之樂皆為淫聲然以詩考之衛詩三

十有九而淫奔之詩才四之一鄭詩二十

有一而淫奔之詩已不翅七之五衛猶為

男悅女之詞而鄭皆為女惑男之語


輯錄
鄭詩

惟有女同車一篇
為男悅女之辭
衛人猶多刺譏懲創之

意而鄭人幾於蕩然無復羞愧悔悟之萌
是則鄭聲之淫有甚於衛矣故夫子論為
邦獨以鄭聲為戒而不及衛蓋舉重而言

固自有次第也詩可以觀豈不信哉
鄭國固無

足論者然緇衣之賢諸侯羔裘之賢大夫
子曰雞鳴之賢夫婦出其東門之獨行君
子於淫亂之風而得之亦甚為之喜幸也
輯錄通釋曰鄭詩之有緇衣羔裘女曰雞
鳴出其東門數篇乃礫中之玉也他如大
叔于田及清人詩雖無足尚猶幸非為淫



奔而作若叔于田則亦未免有男女相悅之疑是其二十一篇之中曉然不為淫奔而作者五六篇而已故曰淫奔之詩不翅七之五然自昔說詩者唯以東門之墀與漆洧為淫詩今朱子乃例以淫奔斥之者蓋即其辭而得其情正以發明放鄭聲之旨不然則衛齊陳詩諸篇非無淫聲夫子何獨以鄭聲為當放哉

詩經疏義會通卷四

欽定四庫全書

經部

詩經疏義會通卷五

詳校官監察御史_臣施朝幹

通政使司副使_臣莫瞻菴覆勘

總校官編修_臣倉聖脉

校對官典簿_臣劉景岳

臚錄監生_臣費元震

欽定四庫全書

詩經疏義會通卷五

元 朱公遷 撰

齊一之八

齊國名本少昊時爽鳩氏所居之地

輯錄孔氏曰爽

鳩氏司寇也爽鳩鷹也鷺故為司寇主盜賊少昊以鳥名官其人之名氏則未聞也在

禹貢為青州之域周武王以封太公望東至

于海西至于河南至于穆陵北至于無棣太

公姜姓本四岳之後

輯錄齊世家云呂尚之先為四岳佐禹平水土

有功封於呂姓姜氏尚隱於渭陽西伯微而遇之曰吾先君望子久矣故號之曰太公望載與俱歸立為師武王既封於齊通工商之平商封於齊都營邱

業便魚鹽之利民多歸之故為大國

漢地理志太公

以齊地舄鹵少五穀而人民寡迺勸以女工之業通魚鹽之利由是人民幅輳輯錄輔氏曰利謂之使者蓋以魚鹽之利為民之便也所謂工者女工為多則或百工皆具焉今

青齊淄

莊持反

濰德棣等州是其地也

嚴氏曰齊魏唐

三國相屬者豈以齊霸而晉代興歟輯錄青川即今青州府齊州今為濟南府淄州今為淄川縣濰州今為濰縣棣州今為樂安州與德州並隸山東

雞既鳴矣朝

音潮

既盈矣匪雞則鳴蒼蠅之聲

賦也言古之賢妃御於君所至於將旦之時必告君
曰雞既鳴矣會朝之臣既已盈矣欲令君早起而視
朝也然其實非雞之鳴也乃蒼蠅之聲也蓋賢妃當
夙興之時心常恐晚故聞其似者而以為真非其心
存警畏而不留於逸欲何以能此故詩人叙其事而
美之也

增釋許氏曰此章謂雞既鳴則君當起之時卿大夫之入朝者亦宜盈庭矣然匪雞之鳴

亦有蠅飛之聲矣蓋蠅飛則天明所以速其起也

東方明

叶謨郎反

矣朝既昌矣匪東方則明

同上

月出之光

賦也東方明則日將出矣昌盛也此再告也

增釋此章謂視

朝之法東方明矣則朝乃昌盛矣然非東方之明乃月出之光耳所以警其情也

○蟲飛薨薨甘與子同夢

叶莫滕反

會且歸矣無庶子子憎

賦也蟲飛夜將旦而百蟲作也

輯錄薨薨恐即指上文蒼蠅之聲也

甘

樂會朝也○此三告也言當此時我豈不樂與子同

寢而夢哉然羣臣之會於朝者俟君不出將散而歸

矣無乃以我之故而并以子為憎乎

增釋此章言雖天明而羣蟲飛

後豈不願與子同夢然禮不可違豈可肆其情乎況
今早起會朝頃刻亦旦歸則大夫退後猶可為宮中
之宴樂幸今毋遲出無以
予之故使子為人所憎也

雞鳴三章章四句

一章聞蒼蠅之聲而疑於耳
二章見月出之光而疑於目

三章乃極其情以致戒焉輯錄解頤曰男女
之際人欲之所存焉節欲而循乎天理者賢
君之所以治也縱欲而滅夫天理者昏君之
所以亂也此詩述賢妃警畏之心如此蓋天
理之所以常存而人心之所以不死也其為
君子之助不亦多乎李氏曰自古人君修身
謹行而無流連荒亡之禍者非特有忠臣義
士亦由賢妃貞女夙夜警戒以成其德周宣
之姜后齊桓之衛姬楚莊之樊妃是也增
釋許氏曰古者太師奏雞鳴則君起臣朝君

辨色而入君日出而視朝此詩蓋國君昏惰夫人賢明相警早出視朝之言不必為陳古刺今人作亦恐此詩之辭則官中之史叙述君與夫人之言以成之也

子之還

旋音

今遭我乎徯

乃刀反

之間

川居賢反

今並驅從兩肩

今揖我謂我僮

許全反

兮

賦也還便捷之貌徯山名也從逐也獸三歲曰肩僮

利也

輯錄毛韻注方言疾也

○獵者交錯於道路且以便捷輕

利相稱譽如此

輯錄鄭氏曰俱出獵而相遭也謂我僮譽之也譽之者以報前言還也嚴

氏曰子之還揖謂我僮以子之能尚且見推此自矜於其黨以氣陵之之辭而不自知其

非也則其俗之不美可見而其來亦必有所自矣

下

所習上之所教也故曰有所自矣○增釋許氏曰詩記齊以遊畋成俗詩人載其馳驅而相遇也意氣飛動鬱鬱見於眉睫之間染其神者深矣夫豈一朝一夕所能及哉

○子之茂

叶莫反

兮遭我乎徂之道

叶徒厚反

兮並驅從兩牡

兮揖我謂我好

叶許厚反

兮

賦也茂美也

○子之昌兮遭我乎徂之陽兮並驅從兩狼兮揖我謂

我臧兮

賦也昌盛也山南曰陽狼似犬銳頭白頰高前廣後

輯錄爾雅曰狼牡名
羴牝名狼羴音歡

臧善也

還三章章四句

反覆稱譽輯錄謝氏曰千萬人
之習俗原於一人之好尚千百

年之敝化生於一時之放心齊俗好田如此
為人上者可不謹哉范氏曰表記云上之好
惡不可不謹也民之表也國君禽荒而國人
以習於田獵為賢閑於馳逐為好安於所習
而不自知其非道
民之道可不慎哉

俟我於著

直據反叶
直居反

乎而克耳以素

叶孫
租反

乎而尚之以

瓊華

叶芳
無反

乎而

賦也俟待也我嫁者自謂也著門屏之間也

輯錄屏必郢反

著通作寧義同

克耳以續

音曠懸瑱

音殿

所謂統

都敢反

也

統備五色曰素

曰青曰黃各舉一色而言也輯錄孔氏曰懸瑱當耳故謂之塞耳統懸瑱者即今之條繩用雜綵線織之

尚加也瓊華美石似王者即所以為瑱也○東萊呂

氏曰昏禮壻往婦家親迎

去聲

既奠雁

增釋奠雁者以其陽往而陰來

也程子謂不再偶也

御

音訝

輪而先歸俟于門外婦至則揖以入

時齊俗不親迎故女至壻門始見其俟已也

當時齊俗但行

婦至壻家之禮耳

○俟我於庭乎而克耳以青乎而尚之以瓊瑩音榮乎而

賦也庭在大門之內寢門之外

輯錄李氏曰堂下至門謂之庭

瓊瑩

亦美石似玉者○呂氏曰此昏禮所謂壻道婦及寢

門揖入之時也

○俟我於堂乎而克耳以黃乎而尚之以瓊英叶於良反乎

而

賦也瓊英亦美石似玉者

輯錄謝氏曰其克耳則以素以青以黃其加飾則瓊

華瓊瑩瓊英修容盛飾非不美也惜乎不知禮耳

○呂氏曰升階而後至堂

此昏禮所謂升自西階之時也

此詩若惜其親迎之不行而又喜其君子

之盛飾禮雖殺

而願則遂矣

著三章章三句

由著而庭由庭而堂此其序也

東方之日兮彼妹

赤朱反

者子在我室兮在我室兮履我

即兮

興也履躡即就也言此女躡我之跡而相就也

此即所見

以為興下章亦然蓋淫奔多在夜旦也詩中之興語不相應義不相因者始見於此

○東方之月兮彼妹者子在我闥

叶它反

兮在我闥兮履

我發

叶方
月反

兮

興也閤門內也發行去也言躡我而行去也

東方之日二章章五句

此以日月
為次序

東方未明

叶謨
即反

顛倒

都老
反

衣裳顛之倒

叶都
妙反

之自公召

之

賦也自從也群臣之朝

音別
潮反必列

色始入○此詩人

刺其君興居無節號令不時言東方未明而顛倒其衣裳則既早矣而又已有從君所而來召之者焉蓋

猶以為晚也或曰所以然者以有自公所而召之者故也

○東方未晞顛倒裳衣倒之顛叶典因反之自公令叶力證反

反之

賦也晞明之始升也輯錄此言明之始謂將旦時日之光氣始升也令號令也

○折音折柳樊圃叶傳故反狂夫瞿瞿俱具反不能晨夜叶羊茹反不

夙則莫音慕

比也柳楊之下垂者柔脆之木也樊藩也圃菜園也

孔氏曰郭璞云藩籬也種菜之地謂之圃其外藩籬謂之園故曰圃菜園也瞿瞿驚顧之

貌夙早也○折柳樊圃雖不足恃然狂夫見之猶驚

顧而不敢越以比晨夜之限甚明人所易知今乃不

能知而不失之早則失之莫也程子曰柳柔脆易折之物折之為藩籬非

堅固也狂夫亦知其有限晝夜之限非不明也乃不能知而不早則晏言無節之甚

東方未明三章章四句一章二章述其事三章刺其人 增釋許氏曰

人君勤則國治惰則政昏固其理也未日出而視朝或可以言勤而日不夙則莫真可見

興居無節號令不時矣然視朝之早若無大過者而其臣遽已怨悻興刺何歟蓋天下之道中而止聖人制禮因人心之所同然未有不由于中也夫人之所自為不必能合乎中而見人之失中則未有不能言者況為人上者可不謹乎難鳴視朝之晚此詩視朝之早皆不能中聖人於齊並存之豈無意哉君子讀詩以自警則於應事必求合於中使無可議則善矣豈特居人君之位而於視朝之事為然哉

南山崔崔

子雖反

雄狐綏綏魯道有蕩齊子由歸既曰歸

止曷又懷

叶胡威反

止

比也南山齊南山也崔崔高大貌狐邪媚之獸綏綏

求匹之貌魯道適魯之道也蕩平易

去聲

也齊子襄公

之妹魯桓公夫人文姜襄公通焉者也

輯錄襄公諸兒僖公子桓

公軌一名允惠

公子隱公弟

由從也婦人謂嫁曰歸懷思也止語

辭言南山有狐以比襄公居高位而行邪行

輯錄鄭氏

曰雄狐行求匹耦於南山之上形貌綏綏然喻襄公居人君之尊而為淫佚之行可恥惡如狐

且文

姜既從此道歸于魯矣襄公何為而復

扶又反

思之乎

○葛屨五兩

如字又音亮

冠綏

如誰反

雙

叶所終反

止魯道有蕩齊

子庸止既曰庸止曷又從止

比也兩二屨也綏冠上飾也屨必兩綏必雙物各有

耦不可亂也

輯錄呂氏曰屨與屨為耦雖五兩各相耦冠綏之雙亦自為耦襄公文姜非其

耦庸用也用此道以嫁于魯也從相從也

○藝麻如之何衡

音橫從反

其畝

莫後反

取

七喻反

妻如之

何必告

工毒反

父母

莫後反

既曰告

同上

止曷

又鞠

居六反

止

興也藝樹鞠窮也○欲樹麻者必先縱橫耕治其田

畝

輯錄齊民要術云種麻欲得良田耕不厭熟縱橫七遍則麻生無葉衡從其畝蓋古法也釋文曰衡

從韓詩作由云南北耕曰由

欲娶妻者必先告其父母

此見治事各有其理

故用語相呼而為興

今魯桓公既告父母而娶矣又曷為使之得窮其欲而至此哉

○析薪如之何匪斧不克娶妻如之何匪媒不得既曰得止曷又極止

興也克能也極亦窮也

此起興與上章同

南山四章章六句

輯錄輔氏曰既曰歸止庸止告止得止言其始之幸得其

正也曷又懷止從止鞠止極止惜其終之肆行縱欲而莫之正也

春秋桓公十八年公與夫人姜氏如齊公薨

于齊

輯錄胡氏曰與者許可之詞曰與者罪在公也夫淫亂者文姜而春秋罪桓公

治其本也

傳曰公將有行遂與姜氏如齊申繻音需

曰女有家男有室無相瀆也謂之有禮易此

必敗公會齊侯于濊

鹿洛二音輯錄濊水在濟南歷城縣西北入濟

遂及文姜如齊齊侯通焉公謫之以告

輯錄注文

姜被責而告齊侯

夏四月享公使公子彭生乘

去聲又如

字

公公薨于車

輯錄彭生多力使與公同乘而殺之

此詩前二

章刺齊襄後二章刺魯桓也

傳具事之本末以見無人道者

必蒙首惡之名無家法必貽
殺身之禍此萬世之深戒也

無田

音佃

甫田維莠

羊九反

驕驕

叶音高

無思遠人勞心忉忉

比也田謂耕治之也甫大也莠害苗之草也驕驕張

王

並去聲

之意忉忉憂勞也○言無田甫田也田甫田

而力不給則草盛矣無思遠人也思遠人而人不至
則心勞矣以戒時人厭小而務大忽近而圖遠將徒

勞而無功也

行遠必自通登高必自卑反是可乎輯錄輔氏曰厭小而務大田甫田者也妄

作者之所為也忽近而圖遠思遠人者也妄想者之所異也妄作則事不遂妄想則心徒勞

無田甫田維莠稂稂無思遠人勞心怛怛

叶旦
悅反

比也稂稂猶驕驕也

輯錄呂氏曰驕驕稂稂皆稂莠侵凌嘉穀之狀

怛怛猶

怛怛也

○婉兮孌

叶龍
眷反

兮總角卩

古惠反
叶卩
古縣反

兮未幾

居豈
反

見兮

突而弁兮

比也婉孌少

去聲

好貌卩兩角貌未幾未多時也突忽

然高出之貌

輯錄釋文曰卒相見謂之突
書曰陀骨反犬從穴中暫出也

韻

弁冠

名○言總角之童見之未久而忽然載弁以出者非

其躡等而強求之也蓋循其序而勢有必至耳此又以明小之可大適之可遠能循其序而脩之則可以忽然而至其極若躡等而欲速則反有所不達矣

為學

為政其道皆然輔氏曰棘欲者無幸成之理循理者有美成之功輯錄呂氏曰苟由其道而循其序則小者俄而大微者俄而著厥德脩罔覺非計功求獲者所能與也

莆田三章章四句

前二章示人以戒後一章示人以法輯錄解順曰田之大

者非果不可治也先小而後大可也人之遠者非果不可求也先近而後遠可也天下之理可循序而漸致不可躡等而欲速果循其序則總角之童可以忽然而見其弁是小非

不可以為大近非不可以為遠也果其踈等則厭小務大而大終不可為忽近圖遠而遠終不可至矣亦何益之有哉

盧令令

音零

其人美且仁

賦也盧田犬也

輯錄孔氏曰犬有田犬守犬戰國策韓云國盧天下之駿犬是盧為田犬

也令令犬領下環聲○此詩大意與還略同

仁與鄭風叔于

田所謂仁者同

○盧重

直龍反

環其人美且鬣

音權

賦也重環子母環也

大環貫一小環也

鬣卷鬚鬚好貌

○盧重鉤

音梅

其人美且偲

七才反

賦也鉤一環貫二也

一大環貫二小環也

偲多鬚之貌春秋傳

所謂于思即此字古通用耳

左傳宣公二年宋華元伐鄭敗績被囚逃歸宋

人歌曰于思于思棄甲復來譏其多鬚貌美而無能也

盧令三章章二句

仁則美其德也鬣與偲則美其貌也所美非美若此類是

也

敝笱在梁其魚魴鰈

古頤反古倫反

齊子歸止其從

才用反

如

雲

比也敝壞筍罟也

說文曰曲竹捕魚

魴鰈大魚也歸歸齊也

如雲言衆也○齊人以敝筍不能制大魚比魯莊公

不能防閑文姜

輯錄胡氏曰魴鰈皆魚之可制者也為其筍之敝敗而不能制文姜本

可防閑而制之由魯莊微弱不能防閑也朱子曰防所以止水開所以扞物故防閑有禁制之意故

歸齊而從之者衆也

○敝筍在梁其魚魴鰈

才呂反

齊子歸止其從如雨

比也魴似魴厚而頭大或謂之魴如雨亦多也

輯錄楊氏

曰如雲如雨言從之者衆也許穆夫人思歸唁其兄許人尤之終以義不得而止若魯莊公剛而有制使

魯人無肯從者如許人焉則
文姜雖欲適齊尚可得手

○敝笱在梁其魚唯唯

唯葵反

齊子歸止其從如水

比也唯唯行出入之貌如水亦多也

敝笱三章章四句

反覆
幾刺

按春秋魯莊公二年夫人姜氏會齊侯于禚

音灼輯錄胡氏曰婦人無外事送迎不出門
既嫁從夫夫死從子今會齊侯于禚是莊公

不能防閑其
母失子道也四年夫人姜氏享齊侯于祝邱

五年夫人姜氏如齊師

輯錄胡氏曰會曰
享猶為之名也至是

如齊師羞惡之心亡矣
夫人之行不可復制矣
七年夫人姜氏會齊

侯于防又會齊侯于穀

禚穀皆齊地祝邱防皆魯地會之數也如

此傳必詳引而備載之以見莊公縱其母之欲也輯錄胡氏傳云禮義者天下之大防也其禁亂之所由生猶防止水之所自來也衛女思歸寧而不得故泉水賦許穆夫人思唁其兄而阻於義故載馳作聖人錄於國風以示後世使知男女之別也今夫人如齊以寧其父母而父母已終以寧其兄弟又義不得往宗國猶爾而况如莒乎觀春秋所書之法則知防閑之道矣

載驅薄薄

普谷反

簞茀朱韞

苦郭反

魯道有蕩齊子發夕

叶祥

反倫

賦也薄薄疾驅聲簟方文席也第車後戶也

簟文必方故曰

方文席蔽車之後戶也

朱朱漆也鄴獸皮之去毛者蓋車革質

而朱漆也夕猶宿也發夕謂離於所宿之舍齊人

刺文姜乘此車而來會襄公也

○四驪

力馳反

濟濟

子禮反

垂轡滿滿

乃禮反

魯道有蕩齊子

豈

開改反

弟

叶待禮反

賦也驪馬黑色也濟濟美貌滿滿柔貌豈弟樂易也

言無忌憚羞恥之意也

豈弟本為盛德之稱此云爾者所謂美惡不嫌同辭也

○汶

音問

水湯湯

失章反

行人彭彭

必亡反

魯道有蕩齊子翱

翔

賦也汶水名在齊南魯北二國之竟

音境氏曰

詩緝汶水增釋許

有二許氏以為出琅邪朱虛縣東泰山東至安邱入
維桑欽以為出泰山萊蕪縣原山西南入濟曾氏入
濟者徐州之汶也入維者青州之汶也今臨清新閘
馬之貞記汶水東出原山西流過萊蕪奉高汶陽之
南剛城之北又西至龍山南分為四派其南河至陽
城南南梁山東匯為大澤其一過壽良北其一經邱亭
南其北曰汶河同流至壽張安民亭與北濟合凡東
蒙徂徠之陰岱嶽之陽諸山溪澗之水皆潔於汶魯

之大川也此蓋專言魯
竟之汶漑音叢邱音厚

湯湯水盛貌彭彭多貌言行

人之多亦以見其無恥也

○汶水滔滔

叶刀反

行人儻儻

表驕反叶音褒

魯道有蕩齊子遊

教

賦也滔滔流貌儻儻衆貌遊教猶翱翔也

載驅四章章四句

無羞惡之心非人也其文姜之謂乎四章皆是此意反覆

譏刺之爾

猗嗟昌兮

音祈

而長兮抑若揚兮美目揚兮巧趨踰兮

射則臧兮

賦也猗嗟歎詞昌盛也頎長貌抑而若揚美之盛也

雖抑之而又若揚之也苟揚目之動也蹌趨翼如也

輯錄蹌毛注巧趨貌傳蹌趨翼如也按論語趨字下連翼如之文謂張拱端好如鳥舒翼趨足容翼手容

趨蹌止言足容蓋趨者必翼一曰舞貌臧善也○齊人極道魯莊公威

儀技藝之美如此輯錄通釋曰射則臧不出正舞則選四矢反皆技藝之美其餘所言

皆威儀之美所以刺其不能以禮防閑其母若曰惜乎其

獨少此耳

○猗嗟名兮美目清兮儀既成兮終日射

食亦反

侯不出

正

音征

兮展我甥

叶系經反

兮

賦也名猶稱也言其威儀技藝之可名也清目清明

也儀既成言其終事而禮無違也侯張布而射之者

也正設的於侯中而射之者也大射則張皮侯而設

鵠

音伏

賓射則張布侯而設正

棲皮曰鵠畫布曰正射有三等將祭擇士射於

澤宮為大射諸侯來朝與之射於朝曰賓射燕賓客射於寢曰燕射此所謂射則賓射也韜錄大射儀注侯謂所射布也鵠所射之主鵠之言較較直也射者所以直已志或曰鵠鳥名射之難中中之為俊是以

取名淮南子曰鴻鵠知來然則所云正者正也亦鳥
名齊魯之間名題肩為正正鵠皆鳥之捷點者餘見
賓之初筵謝氏曰侯猶今之射垛正猶今之箭貼
周禮梓人有皮侯采侯獸侯天子大射用皮侯賓射
用采侯燕射用獸侯鵠以皮為之三分侯之一似鳥
之棲故曰棲鵠正則畫布為之亦三分其侯而居一
展誠也姊妹之子曰甥言稱其為齊之甥而又以明
非齊侯之子此詩人之微詞也按春秋桓公三年夫
人姜氏至自齊六年九月子同生即莊公也十八年
桓公乃與夫人如齊則莊公誠非齊侯之子矣

增釋
吳師

道曰龜山云九月丁卯子同生曰子同者正名其為
桓公之子也序曰人以為齊侯之子其詩曰展我甥

兮則明莊公非齊侯之子也莊公之生桓公六年也至十八年始書夫人姜氏遂如齊而左傳因載申繻諫與桓公謫齊之事則前此文姜未嘗如齊也此春秋所以為別微也今傳取之說春秋者當以此為正

○荷嗟變

叶龍春反

兮清揚婉

叶許願反

兮舞則選

雪戀反

兮射則

貫

叶扁縣反

兮四矢反

叶孚絢反

兮以禦亂

叶靈春反

兮

賦也變好貌清目之美也揚眉之美也婉亦好貌清目

明眉上廣則見其婉然而美傳釋君子偕老及野有蔓草與此篇各不同而義則一也

選異於

衆也或曰齊於樂節也貫中而貫草也四矢禮射每

發四矢

輯錄禮射謂以禮樂射也四矢象有事於四方集傳云貫草則是主皮之射矣詳見行葦

反復也中皆得其故處也言莊公射藝之精可以禦

亂

輯錄范氏曰射足以禦亂而禮不足以防淫也

如以金僕姑射

音石

南宮長

上聲

萬可見矣

金僕姑矢名南宮長萬宋大夫魯與宋戰公射長萬獲之見左傳莊公十一年

猗嗟三章章六句

反覆譏刺輔氏曰射者男子之事故三章皆以射言之

或曰子可以制母乎趙子

伯循唐人

曰夫死從子

通乎其下況國君乎君者人神之主

下治民人上承

宗廟

風教之本也不能正家如正國何若莊公

者哀痛以思父誠敬以事母威刑以馭下車

馬僕從

去聲

莫不俟命夫人徒往乎夫人之往

也則公哀敬之不至威命之不行耳

莊公之罪在此

輯錄輔氏曰趙子之說義理之正聖賢復生不可易也

東萊呂氏曰此

詩三章譏刺之意皆在言外嗟嘆再三則莊

公所大闕者不言可見矣

輯錄嚴氏曰變風之體意在言外如

此詩極言其人容貌威儀技藝之美而以嘆息之詞發之是其人所不足者必有在於容貌威儀技藝之外矣讀者既默會其意見得自倚嗟而下句句是稱美處節節是歎不滿處詞不急迫而意深切矣

齊國十一篇三十四章一百四十三句

齊俗惟以

射獵輕儇相尚淫奔之事惟東方之日一篇而已民間荒穢未甚也而襄公以一國之君居萬民之上禽獸其行肆為元惡其罪不可勝誅矣聖人著之而魯桓莊之醜亦有不可容掩者蓋天下所同惡之人雖父母之國不可諱也

魏一之九

魏國名本舜禹故都

輯錄孔疏舜都蒲坂禹都平陽或安邑皆河東

界魏境內有其都爾魏不居其墟也

在禹貢冀州雷首之北析

城之西南枕

去聲

河曲北涉汾

音墳

水其地陘

音狹

隘而民貧俗儉盖有聖賢之遺風焉

輯錄鄭氏曰昔

舜耕歷山陶河濱禹菲飲食惡衣服卑宮室此儉約之化於是猶存周初以封

同姓後為

去聲下同

晉獻公所滅而取其地

輯錄左傳

云虞虢焦滑霍揚韓魏皆姬姓也閔公元年晉獻公滅耿霍魏賜畢萬魏以為大夫今

河中府解

胡買反

州即其地也

輯錄解州今隸山西平陽府

蘇氏曰魏地入晉久矣其詩疑皆為晉而作

故列於唐風之前猶邶鄘之於衛也今按篇

中公行

音杭

公路公族皆晉官疑實晉詩又恐

魏亦嘗有此官蓋不可考矣

魏詩為晉而作似矣然國小無

政似非晉事儉嗇偏急與勤儉質樸亦不同直以為晉詩不可也故蘇氏朱子之說皆有

疑字輯錄嚴氏曰魏唐無淫詩蓋猶有先代之風化焉

糾糾

吉黝反

葛屨可以履霜摻摻

所街反

女手可以縫裳要

於遙反

之褌

紀力反

之好人服

叶蒲反

之

興也糾糾繚戾寒涼之意

繚音遼

夏葛屨冬皮屨

輯錄孔疏

夏葛屨猶締綌所以當暑特為便於時耳非行禮之服若行禮雖夏猶當用皮

摻摻猶纖纖

也女婦未廟見

音現

之稱也娶婦三月廟見

三月天道變婦道於

此而 然後執婦功

輯錄孔疏三月廟見謂無舅姑者婦入三月乃見舅姑之廟若有舅

姑則士昏禮云質明贊見婦於舅姑不待三月也雖即見舅姑亦三月乃助祭行未祭行亦未成婦也

要裳要襪衣領好人猶大人也○魏地陘隘其俗儉

嗇

音色

而褊急故以葛屨履霜起興而刺其使女縫裳

蘇氏白履霜已用葛屨矣至於暑又將何所用乎婦未廟見已使縫裳矣則執婦功又將何所使乎愚謂

葛屨不可以履霜女子未可使縫裳皆處事之失宜者故以語相呼為興又使治其要襪

而遂服之也此詩疑即縫裳之女所作

輯錄輔氏曰葛屨履霜自

儉嗇者言之女手縫裳自褊急者言之夫人之情儉嗇者必褊急也

○好人提提

徒兮反

宛

於阮反

然左辟

音避

佩其象揅

勅帝反

維

是褊心是以為刺

叶音砌

賦也提提安舒之意宛然讓之貌也

輯錄嚴氏曰宛委曲遜順貌

讓而辟者必左

輯錄孔疏不敢當主故就客位

揅所以摘音剔髮用象

為之貴者之飾也其人如此若無有可刺矣所以刺

之者以其褊迫急促如前章之云耳

容儀服飾雖為大人而中心褊

急實不稱其外也蓋表裏之不相符如此不能不刺之也

葛屨二章一章六句一章五句

前章直刺其褊後章美其容儀

服飾而
刺其褊

廣漢張氏曰夫子謂與其奢也寧儉則儉雖
失中本非惡德然而儉之過則至於吝嗇迫
隘計較分毫之間而謀利之心始急矣葛屨
汾沮洳園有桃三詩皆言急迫瑣碎之意

彼汾

挾云反

沮

子豫反

洳

如豫反

言采其莫

音慕

彼其

音記

之子美

無度美無度殊異乎公路

興也汾

音墳

水名出太原晉陽山西南入河沮

將豫反

洳

音茹人並平聲

水浸處下濕之地莫菜也似柳葉厚而長有

毛刺可為羹

輯錄孔疏陸璣云莫莖大如箸赤節節一葉今人纒以取繭緒其味酢而滑始

生又可生食

無度言不可以尺寸量也公路者掌公之路

車晉以卿大夫之庶子為之○此亦刺儉不中

去聲禮

之詩言若此人者美則美矣

此以二彼字相呼為興

然其儉嗇

褊急之態殊不似貴人也

兩句轉其語而譏之

○彼汾一方言采其桑彼其之子美如英

叶於良反

美如英

殊異乎公行

戶郎反

興也一方彼一方也史記扁鵲視見垣一方人

扁鵲典反

輯錄扁鵲姓秦名越人長桑君與之藥視垣見一方人以此視病盡見五臟癥結所謂垣一方者猶此詩言汾一方古語皆然也癥音微索隱曰方猶邊也言能隔牆見彼邊人也英華也公行即

公路也以其主兵車之行列故謂之公行也

○彼汾一曲言采其蕢

音續

彼其之子美如玉美如玉殊

異乎公族

興也一曲謂水曲流處蕢水鳥

音昔

也葉如車前草

輯錄

孔疏蕢牛脣水鳥也如續斷寸寸有節拔之可復今澤瀉也

公族掌公之宗族晉

以卿大夫之適

音嫡

子為之

此與前篇可謂知君子之大體輯錄左傳宣公二年

初驪姬之亂詛無畜羣公子自是晉無公族及成公即位乃宦卿之適子以為公族其庶子為公行注云

無公族故廢

公族之官

汾沮如三章章六句

公族比公路公行為貴故一詩之意自輕而重也

增釋許氏曰公路公行公族大夫也采莫采桑采蕢細民之事也大夫而為細民之事是急於利而用心褊也彼其之子雖美奈奪民之利何此其所以興刺也

園有桃其實之殷心之憂矣我歌且謠

音遠

不知我者謂

我士也驕彼人是哉

叶將黎反

子曰何其

音基

心之憂矣其誰

知之其誰知之蓋亦勿思

叶新齋反

興也殽食也合曲曰歌徒歌曰謠

毛氏本作曲合樂曰歌此易其文如

此蓋歌必合於琴瑟謠則徒歌而已

其語辭○詩人憂其國小而無政

故作是詩言園有桃則其實之殽矣心有憂則我歌

且謠矣

桃實則茹而納之心憂則寫而出之此以出納之意相對而為興也輯錄程子曰此詩憂

深思遠矣國無政事則亡故憂思之深至歌且謠

然不知我之心者見其歌

謠而反以為驕且曰彼之所為已是矣而子之言獨

何為哉蓋舉國之人莫覺其非而反以憂之者為驕

也於是憂者重嗟歎之以為此之可憂初不難知彼

之非我特未之思耳誠思之則將不暇非我而自憂

矣

氣象迫促危亡之兆也然惟智者明之而愚者昧焉故不免乎嗟嘆如此○增釋許氏曰園有桃則

其實之殷矣心之憂則歌且謠矣不知我者見我之歌謠則以為傲世陵物也於是答之曰彼為政者之所行果為是乎所言何為如此也是則我心之憂矣誰復能知之乎然初不難知其莫知者以不思耳

○園有棘其實之食心之憂矣聊以行國

以于逼反

不知我

者謂我士也罔極彼人是哉子曰何其心之憂矣其誰知之其誰知之蓋亦勿思

興也棘棗之短者

輯錄埤雅曰大者棗小者棘於文重東為棗並東為棘蓋棗性重喬

棘則低矣故其制字如此○本草注棘有赤白二種小棗也叢高三四尺花葉莖實俱似棗也聊且

略之辭歌謠之不足則出遊於國中而寫憂也

謝氏曰此

猶駕言出遊以寫我憂也愚謂歌謠不足而又出遊以其憂之難寫也

極至也罔極言

其心縱恣無所至極

園有桃二章章十二句

憂患之意反覆道之輯錄輔氏曰秦離之憂憂

王室之已覆也園有桃之憂憂魏國之將亡也憂其已覆而不我知則亦已矣憂其將亡而不我知則欲其思之者亦宜也

陟彼岵

音戶

兮瞻望父兮父曰嗟予子行役夙夜無已上

慎旃哉猶來無止

賦也山無草木曰岵

爾雅山多草木曰岵無草木曰岵此本毛傳字誤也

上猶

尚也○孝子行役不忘其親故登山以望其父之所

在因想像其父念已之言曰嗟乎我之子行役夙夜

勤勞不得止息又祝之曰庶幾

平聲

慎之哉猶可以來

歸無止於彼而不來也蓋生則必歸死則止而不來

矣或曰止獲也言無為

去聲

人所獲也

○陟彼岵

起音

兮瞻望母

叶蒲彼反

兮母曰嗟予季行役夙夜

無寐上慎旃哉猶來無棄

賦也山有草木曰岵

注見上章

季少

去聲

子也尤憐愛少子

者婦人之情也無寐亦言其勞之甚也棄謂死而棄其尸也

○陟彼岡兮瞻望兄

叶虔王反

兮兄曰嗟予弟行役夙夜必

偕

叶舉里反

上慎旃哉猶來無死

叶想止反

賦也山脊曰岡

增釋曰岵曰岵曰岡蓋所思漸極所登漸高而瞻望期可及也

必偕

言與其儕

林皆反

同作同止不得自如也

輔氏曰既思其父又思其

母又思其兄既想像其所以念已者又想像其所以祝已者斯人也必能以親之心為心也愚謂三章皆以慎言則凡所以謹其身者宜無不至矣

陟岵三章章六句

以父母兄為次序觀陟岵而魏之所以役其民者可知

觀碩鼠而魏之所賦其民者可見

十畝之間

叶居賢反

兮桑者閑閑

叶胡田反

兮行與子還

叶音旋

兮

賦也十畝之間郊外所受場圃之地也

張子曰周制國郭之外有

聽為場圃之地者輯錄呂氏曰所謂十畝者特甚言之耳末可以為定數也

閑閑往來者

自得之貌行猶將也還猶歸也○政亂國危賢者不

樂

洛音

仕於其朝

潮音

而思與其友歸於農圃故其詞如

此

輯錄輔氏曰危邦不入亂邦不居君子仕止之常法也使賢者不樂仕於其朝則其政亂國危可知

○十畝之外

叶五
墜反

兮桑者泄泄

以世
反

兮行與子逝兮

賦也十畝之外鄰圃也泄泄猶閑閑也逝往也

十畝之間二章章三句

坎坎伐檀

叶徒
沿反

兮寘之河之干

叶居
焉反

兮河水清且漣

力
屢

反
猗

於宜
反

不稼不穡胡取禾三百廛

直連
反

兮不狩不獵

胡瞻爾庭有縣

音元

貍

音暄

兮彼君子兮不素餐

七丹反

叶

兮

賦也坎坎用力之聲檀木可為卓者寘與置同干厓

也漣風行水成文也猗與兮同語詞也書斷斷

丁亂反

猗大學作兮莊子亦云而我猶為人猗

見大宗師

是也種

之曰稼斂

去聲

之曰穡

輯錄孔疏以後穡故知種

曰稼斂曰穡若散

則相通

胡何也一夫所居曰厓

輯錄謝氏曰古者一夫受田百畝別受五畝以

為宅孟子曰五畝之宅是也

猗亦獵也貍貉類素空餐食也詩

人言有人於此用力伐檀將以為車而行陸也今乃

寘之河干則河水清漣而無所用

輯錄解順曰車非不可用以稼穡也

然欲稼穡者必之乎原隰河干固非稼穡之地也非不可用以狩獵也然欲狩獵者必之乎山林河干固非狩獵之處也謂不稼穡而不粒食不狩獵而不肉食蓋無功不以微俸而苟得亦不以沮抑而自悔其勵志如此亦可以為賢矣故詩人述其事而歎之曰彼君子者真可謂不素餐者矣贊美之詞也雖

欲自食其力而不可得矣然其志則自以為不耕則不可以得禾不獵則不可以得獸是以甘心窮餓而不悔也詩人述其事而歎之以為是真能不空食者

後世若徐穉之流非其力不食其厲志蓋如此

前三句述

其事中四句推其志後二句贊其人輯錄後漢徐穉字孺子豫章人家貧常自耕稼非其力不食今豫章城內有孺子亭世皆景慕焉由其厲志守義而然也

○坎坎伐輻

音福叶筆力反

兮寘之河之側

叶莊力反

兮河水清且

直猗不稼不穡胡取禾三百億兮不狩不獵胡瞻爾庭有縣特兮彼君子兮不素食兮

賦也輻車輻也伐木以為輻也直波文之直也十萬

曰億蓋言禾束之數也

輯錄孔疏禾束之數謂刈禾之把數

獸三歲曰

特

○坎坎伐輪兮寘之河之漘

順倫反

兮河水清且淪猗不

稼不穡胡取禾三百困

立倫反

兮不狩不獵胡瞻爾庭有

縣鶉

音純

兮彼君子兮不素飧

素門反叶素倫反

兮

賦也輪車輪也伐木以為輪也淪小風水成文轉如

輪也困圓倉也鶉鶉

音庵

屬熟食曰飧

輯錄通釋曰有勞心而得食者

有勞力而得食者有躬耕而自食者豈必人人自耕以食哉但不可無其事而食其食耳伐檀君子意正如此故詩人美其甘貧樂道雖不見用而不苟食也

伐檀三章章九句

稱美之意反覆道之○陟岵思親孝子也伐檀食力卓行

者也園有桃有憂亂之心十畝之間有去亂之志則皆見幾者也魏雖小國而有賢如此

碩鼠碩鼠無食我黍三歲貫

古亂反

女

音汝

莫我肯顧

叶果反

逝將去女適彼樂

音洛下同

土樂土樂土爰得我所

比也碩大也三歲言其久也貫習

輯錄廣韻古亂反事也謝氏曰訓事

集傳訓習當從古患反

顧念逝徃也樂土有道之國也爰於也

○民困於貪殘之政故託言大鼠害已而去之也

○碩鼠碩鼠無食我麥

叶訖反

三歲貫女莫我肯德逝將

去女適彼樂國

叶于
逼反

樂國樂國爰得我直

比也德歸恩也

歸恩猶言感我之恩惠也韓錄范氏曰莫我肯德者不以我為德也民出

力以事上不以為德而反蠶食之所以去也

直猶宜也

○碩鼠碩鼠無食我苗

川音
毛

三歲貫女莫我肯勞逝將

去女適彼樂郊

叶音
高

樂郊樂郊誰之永號

戶毛
反

比也勞勤苦也謂不以我為勤勞也永號長呼也言

既往樂郊則無復

扶又
反

有害已者當復為

去聲

誰而永

號乎

碩鼠三章章八句

得所得直則就利誰之永號則遠害○增釋許氏曰詩人


欲適彼樂土固畏從政者之貪殘而欲去然亦未知所去者何土下言樂土樂土猶是意望料想之辭得樂土而居之其得我所乎次言得樂國而居其得我養生之直道乎上二章食黍食麥國可見其貪殘至於苗而未秀者亦已食之則其貪虐尤甚所以其民尤急於去也樂土樂國猶有其所欲去之地至邑外之郊亦姑往之惟欲出此境也然樂郊樂郊又將長號於誰使之極我乎可見其民窮蹙之甚進退無據不聊其生國其可久存哉

逝發語辭

魏國七篇十八章一百二十八句

魏國土地
削小儉嗇

福急已可哀矣而又昏亂殘虐以促之使
賢者思去其位民人思去其國上下離心
如此不亡得乎輔氏曰變風作於平桓之
世而魏乃滅於惠王之十七年纔五六十
耳年



詩經疏義會通卷五